


大毘婆沙論

牙六字五

三百七十六
義五

50497



阿毗達磨大毗婆沙論卷第六十五

義

五百大阿羅漢等造

三藏法師

玄奘奉

詔譯

結蘊第二中有情納息第三之三

三結乃至九十八隨眠一一盡何果攝問何
故作此論答先雖說十五部結盡諸果所攝
而未說十六章煩惱盡諸果所攝今欲說之
故作斯論答三結中有身見盡四沙門果攝
或無處四沙門果攝者謂彼盡證預流果時
即預流果攝乃至證阿羅漢果時即阿羅漢
果攝或無處者謂無異生非果攝義所以者
何無異生者能離非想非非想處有身見故
次第者苦現觀一心頃集滅現觀各四心頃

道現觀三心頃有身見盡非果攝如三結中
有身見盡應知五順下分結中有身見五見
中有身見邊執見盡亦尔自性等故同對治
故戒禁取疑盡四沙門果攝四果攝義如前
應知此無異生非果攝義所以者何無異生
者能離非想非非想處戒禁取疑故亦無次
第者非果攝義所以者何道類智忍滅時方
斷彼盡道類智生時隨其所應證前三果戒
禁取疑盡即前三果攝故如三結中戒禁取
疑盡應知四瀑流軛中見瀑流軛四取中見
取戒禁取四身繫中戒禁取此實執身繫五
順下分結中戒禁取疑五見中邪見見取戒

禁取七隨眠中見疑隨眠九結中見取疑結
盡亦亦自性等故同對治故三不善根盡不
還阿羅漢果攝或無處不還果攝者謂彼盡
證不還果時即不還果攝阿羅漢果攝者謂
彼盡證阿羅漢果時即阿羅漢果攝或無處
者謂諸異生已離欲染彼盡非果攝已離欲
染入正性離生者見道十五心頃彼盡非果
攝無次第者非果攝義所以者何離欲染第
九無間道滅時方斷彼盡第九解脫道生時
證不還果即不還果攝故如三不善根盡應
知三漏中欲漏四瀑流軛中欲瀑流軛四取
中欲取四身繫中貪欲瞋恚五蓋中前四蓋

五結中瞋嫉慳結五順下分結中貪欲瞋恚
六愛身中鼻舌觸所生愛身七睡眠中貪欲
瞋恚九結中恚嫉慳結盡亦亦自性等故同
對治故有漏無明漏盡阿羅漢果攝謂彼盡
證阿羅漢果時即阿羅漢果攝無有異生非
果攝義所以者何無異生者能離非想非非
想處有漏無明漏故亦無次第者非果攝義
所以者何金剛喻定現在前時方斷彼盡初
盡智生時證阿羅漢果彼盡即阿羅漢果攝
故如有漏無明漏盡應知四瀑流軛中有無
明瀑流軛四取中我語取五結中貪慢結五
順上分結中除色貪餘四六愛身中意觸所

生愛身七隨眠中有貪無明慢九結中愛慢
無明結盡亦尔自性等故同對治故疑蓋盡
四沙門果攝或無處四沙門果攝者如前說
或無處者謂諸異生已離欲染疑蓋盡非果
攝已離欲染入正性離生者見道十五心頃
疑蓋盡非果攝次第者道現觀二心頃疑蓋
盡非果攝色貪順上分結盡阿羅漢果攝或
無處阿羅漢果攝者謂彼盡證阿羅漢果時
即阿羅漢果攝或無處者謂諸異生已離色
染彼盡非果攝已離色染入正性離生者見
道十五心頃及道類智等諸有學位彼盡非
果攝次第者從離第四靜慮染第九解脫道

乃至金剛喻定現在前時彼盡非果攝如色
貪順上分結盡應知眼耳身觸所生愛身盡
亦亦自性等故同對治故然有差別此中應
言或無處者謂諸異生已離梵世染彼盡非
果攝已離梵世染入正性離生者見道十五
心頃及道類智等諸有學位彼盡非果攝次
第者從離初靜慮染第九解脫道乃至金剛
喻定現在前時彼盡非果攝九十八睡眠中
欲界見苦集滅道所斷睡眠盡四沙門果攝
或無處此如十五部結中欲界前四部盡說
欲界修所斷睡眠盡不還阿羅漢果攝或無
處此如十五部結中欲界第五部盡說色界

見苦集滅道所斷隨眠盡四沙門果攝或無
處此如十五部結中色界前四部盡說色界
修所斷隨眠盡阿羅漢果攝或無處此如十
五部結中色界第五部盡說無色界見苦集
滅所斷隨眠盡四沙門果攝或無處此如十
五部結中無色界前三部盡說無色界見道
所斷隨眠盡四沙門果攝此如十五部結中
無色界第四部盡說無色界修所斷隨眠盡
阿羅漢果攝此如十五部結中無色界第五
部盡說

預流向中諸結盡何果攝答無處所以者何
預流果前無沙門果攝彼盡故預流果中諸

結盡何果攝答預流果謂此果中揔攝三界
見所斷諸結盡一來向中諸結盡何果攝答
預流果或無處預流果攝者謂此果中揔攝
三界見所斷諸結盡或無處者謂倍離欲染
入正性離生者見道十五心頃諸結盡非果
攝次第者欲界前五品修所斷諸結盡非果
攝所以者何是勝果道所證得故如勝果道
非果所攝所得結盡理亦應尔一來果中諸
結盡何果攝答一來果謂此果中揔攝三界
見所斷諸結盡及攝欲界修所斷前六品諸
結盡不還向中諸結盡何果攝答一來果或
無處一來果攝者謂此果中揔攝三界見所

斷諸結盡及攝欲界修所斷前六品諸結盡
或無處者謂已離欲乃至無所有處深入正
性離生者見道十五心頃諸結盡非果攝次
第者欲界修所斷第七第八品諸結盡非果
攝不還果中諸結盡何果攝答不還果謂此
果中摠攝三界見所斷諸結盡及攝欲界修
所斷諸結盡阿羅漢向中諸結盡何果攝答
不還果或無處不還果攝者謂此果中摠攝
三界見所斷諸結盡及攝欲界修所斷諸結
盡或無處者謂離初靜慮一品乃至非想非
非想處八品染諸結盡非果攝所以者何是
勝果道所證得故如勝果道非果所攝所得

結盡理亦應尔阿羅漢果中諸結盡何果攝
答阿羅漢果謂此果中摠攝三界見修所斷
諸結盡問此中為說諸向果中所成就諸結
盡為說諸向果中新所證得諸結盡設尔何
失二俱有過所以者何若說諸向果中所成
就諸結盡者前三果中諸結盡不應惟說自
果攝如已離欲前五品染入正性離生者至
道類智時證預流果彼欲界修所斷五品結
盡非此果攝何故不說或無處耶又已離欲
前八品染入正性離生者至道類智時證一
來果彼欲界修所斷第七八品結盡非此果
攝何故不說或無處耶又已離欲乃至無所

有處染入正性離生者至道類智時證不還
果彼上二界七地修所斷結盡非此果攝何
故不說或無處耶若說諸向果中新所證得
諸結盡者後三向中諸結盡不應亦說前果
攝向中新所證結盡定非前果所攝故答此
中揔說諸向果中所成就諸結盡問若尔善
通後三向難前三果難當云何通答此說具
縛入見道者故前三果所成就結盡惟說自
果攝有作是說此中果位說新所證所求滿
故向位未滿所求事故揔說成就故向果位
二說善通

具見世尊弟子未離欲染欲界修所斷諸結

盡何果攝。若一來果或無處一來果攝者。謂欲界修所斷前六品諸結盡。或無處者。謂欲界修所斷第七第八品諸結盡。已離欲。染未離色。染色界修所斷諸結盡。何果攝。若無處。謂離初靜慮一品乃至第四靜慮八品。染彼修所斷諸結盡。非果攝。已離色。染未離無色。染無色。修所斷諸結盡。何果攝。若無處。謂離空無邊處一品乃至非想非非想處八品。染彼修所斷諸結盡。非果攝。

此中說有四沙門果。謂預流果一來果不還果阿羅漢果。問何故說此四沙門果。若爲止他宗顯已義。故謂或有說四沙門果。惟是無

爲如分別論者問彼何故作是說荅依契經
故如契經說佛告苾芻吾當爲汝說沙門性
及沙門沙門果云何沙門性謂八支聖道云
何沙門謂成就此法者云何沙門果謂預流
果乃至阿羅漢果云何預流果謂永斷三結
云何一來果謂永斷三結薄貪瞋癡云何不
還果謂永斷五順下分結云何阿羅漢果謂
永斷貪瞋癡及一切煩惱依此經故說沙門
果惟是無爲爲遮彼意顯沙門果亦有爲亦
無爲若沙門果惟無爲者便違契經如契經
說有行四向有住四果此中住者住有爲果
非無爲果以無爲果不可住故彼作是說無

爲果中亦可說住故施設論作如是說彼住
於斷不求勝進爲得未得爲獲未獲爲觸未
觸爲證未證彼論非證所以者何彼論意說
住於道故謂住斷者非如乘象馬住象馬上
但於證斷道不進不退說名爲住有餘契經
惟說有爲是沙門果如說五根增上猛利迅
速圓滿名俱解脫阿羅漢果次減劣者名慧
解脫阿羅漢果次減劣者名不還果次減劣
者名一來果最減劣者名預流果此中惟說
信等五根勝劣差別名沙門果故知沙門果
非但是無爲問若沙門果亦是有爲云何通
彼所引契經荅四沙門果實通有爲無爲而

彼契經且說是無爲者所以者何惟說果故
若法是沙門果非沙門性者彼經說之道是
沙門果亦是沙門性故彼不說復次若法是
婆羅門果非婆羅門性者彼經說之道是婆
羅門果亦是婆羅門性故彼不說復次若法
是梵行果非梵行性者彼經說之道是梵行
果亦是梵行性故彼不說復次若法是果非
有果者彼經說之道是果亦是有果故彼不
說復次若法是離非有離者彼經說之道是
離亦是有離故彼不說復次若法是所求非
所厭者彼經說之道是所求亦是所厭故彼
不說爲止如是他宗所說欲顯自宗故說四

果復次勿爲止他顯示已義但爲開發法相
正理令他了知故說四果

問四沙門果自性是何答品類足論作如是
說預流果有二種謂有爲及無爲云何有爲
預流果謂證預流果者於諸學法已正當得
已得者謂過去正得者謂現在當得者謂未
來云何無爲預流果謂證預流果者於諸結
斷已正當得已得者謂過去正得者謂現在
當得者謂未來問道是有爲墮在三世可說
於彼已正當得斷是無爲不墮三世云何說
於彼已正當得耶答品類足論應作是說於
諸結斷得獲觸證不應說言已正當得作是

說者有別意趣欲顯彼斷得及相續得者謂
彼斷得在過去名已得在現在名正得在未
來名當得相續者謂證斷相續在過去名已
得在現在名正得在未來名當得又彼論說
一來果有二種謂有爲及無爲云何有爲一
來果謂證一來果者於諸學法已正當得餘
如前說云何無爲一來果謂證一來果者於
諸結斷已正當得餘如前說不還果有二種
謂有爲及無爲云何有爲不還果謂證不還
果者於諸學法已正當得餘如前說云何無
爲不還果謂證不還果者於諸結斷已正當
得餘如前說阿羅漢果有二種謂有爲及無

為去何有為阿羅漢果謂證阿羅漢果者於
諸無學法已正當得餘如前說云何無為阿
羅漢果謂證阿羅漢果者於諸結斷已正當
得餘如前說施設論中亦作是說預流果有
二種謂有為及無為云何有為預流果謂此
果得及此得得此果得者謂有為無為預流
果得此得得者謂此果得之得由此果得故
成就預流果由此得得故成就此果得若諸
學根學力學戒學善根入學法及此種類諸
學法是名有為預流果云何無為預流果謂
三結永斷及此種類諸結法永斷八十八隨
眠永斷及此種類隨眠法永斷是名無為預

流果一來果有二種謂有爲及無爲云何有
爲一來果謂此果得及此得得餘如前說若
諸學根學力學戒學善根八學法及此種類
諸學法是名有爲一來果云何無爲一來果
謂三結永斷及此種類諸結法永斷八十八隨
眠永斷及此種類隨眠法永斷貪瞋癡倍斷
及此種類煩惱法倍斷是名無爲一來果不
還果有二種謂有爲及無爲云何有爲不還
果謂此果得及此得得餘如前說若諸學根
學力學戒學善根八學法及此種類諸學法
是名有爲不還果云何無爲不還果謂五順
下分結永斷及此種類諸結法永斷九十二隨

眠永斷及此種類隨眠法永斷是名無爲不
還果阿羅漢果有二種謂有爲及無爲云何
有爲阿羅漢果謂此果得及此得得餘如前
說若諸無學根無學力無學戒無學善根十
無學法及此種類諸無學法是名有爲阿羅
漢果云何無爲阿羅漢果謂貪瞋癡永斷及
一切煩惱永斷越一切趣斷一切路滅三種
火渡四瀑流摧諸傲慢離諸渴愛破阿賴耶
無上究竟無上寂靜無上安樂及諸愛盡離
滅涅槃是名無爲阿羅漢果是謂四沙門果
自性我物相分本性已說自性所以今當說
問何故名沙門果沙門果是何義答所有聖

道是沙門性有爲無漏及諸擇滅是此果故名沙門果問若尔此果不應惟四謂見道中八忍品是沙門性八智品是有爲沙門果八部法斷是無爲沙門果離欲界染時九無間道是沙門性九解脫道是有爲沙門果九品法斷是無爲沙門果如是乃至離非想非非想處染時應知亦尔如是便有八十九有爲沙門果八十九無爲沙門果若依世說此沙門果有二百六十七謂八十九在過去八十九在現在八十九在未來品類足論作如是說云何果法謂一切有爲法及擇滅隨諸聖道尔所刹那即有尔所有爲沙門果隨有漏

法有尔所量擇滅無為亦有尔所隨有尔所
擇滅無為即有尔所無為沙門果若以刹那
在身分別便有無量沙門果體何故惟說四
沙門果有作是說此是世尊為受化者所宜
聞故有餘略說脇尊者曰惟佛世尊能具正
知諸法性相勢用分齊餘不能知若此堪立
沙門果者即便立之若不堪者便不建立故
不應難尊者世友作如是說此是世尊為開
智者簡要而說故不應難復次此四果位易
見易施設謂此是預流果乃至此是阿羅漢
果所餘諸位難見難施設故佛但說四沙門
果復次此四果位諸瑜伽師於果發起增上

慶悅餘位不介如務農者於六月中修治稼
穡後收子實積置場中生大慶悅此亦如是
故佛惟說四沙門果復次此四果位具三因
緣一捨曾得道二得未曾得道三證結斷一
味得餘位不介故佛惟說四沙門果復次此
四果位具五因緣一捨曾得道二得未曾得
道三證結斷一味得四頓得八智五一時修
十六行相餘位不介故佛唯說四沙門果復
次此四果位是瑜伽師最勝安隱蘇息之處
餘位不介故佛唯說四沙門果復次此四果
位所有聖道是功用是功用究竟所有結斷
是所作是所作究竟餘位聖道是功用非功

用究竟餘位結斷是所作非所作究竟故佛
唯說四沙門果復次此四果位容修行者廣
修聖道餘位不尔故佛惟說四沙門果復次
此四果位諸瑜伽師能善了知功德過失功
德者謂道及道果過失者謂生死因果餘位
不尔故佛惟說四沙門果復次此四果位諸
瑜伽師方能善取四聖諦相餘位不尔如人
道行於四方相未能善取若坐一處方能善
取此亦如是故佛惟說四沙門果復次此四
果位若退失時有證知者餘位不尔如村邑
中若被劫奪有證知者非兩中間故佛惟說
四沙門果復次此四果位諸瑜伽師先廣加

行安足堅固餘位不尠預流果先廣加行者
謂彼先求解脫果故精勤修習惠施淨戒不
淨觀持息念念住聞思修慧及煖頂忍卅第
一法并見道中十五心頃即此揔名安足堅
固有說從初乃至卅第一法名廣加行見道
十五心名安足堅固一來果先廣加行者謂
即前說及離欲染諸加行道六無間道五解
脫道即此名爲安足堅固有說預流果名安
足堅固不還果先廣加行者謂即前說及離
欲染諸加行道三無間道二解脫道即此名
爲安足堅固有說一來果名安足堅固阿羅
漢果先廣加行者謂即前說及離初靜慮一

品染諸加行道乃至金剛喻定即此摠名安足堅固有說不還果名安足堅固故佛惟說四沙門果復次此四果位諸瑜伽師斷絕止息一切生分餘位不尔謂預流果除欲界七生及色無色界一一處一生餘一切生得非擇滅一來果除欲界二生及色無色界一一處一生餘一切生得非擇滅不還果除色無色界一一處一生餘一切生得非擇滅阿羅漢果於一切生得非擇滅故佛唯說四沙門果復次此四果位諸瑜伽師摠集三界見修所斷煩惱斷得餘位不尔謂預流果位摠集三界見所斷煩惱斷得一來果位摠集三界

見所斷及欲界修所斷前六品煩惱斷得不
還果位摠集三界見所斷及欲界修所斷九
品煩惱斷得阿羅漢果位摠集三界見修所
斷一切煩惱斷得故佛唯說四沙門果復次
此四果位是瑜伽師本所求處餘位不尔故
佛唯說四沙門果復次此四果位諸瑜伽師
說有退者若未還得必不命終餘位不尔故
佛唯說四沙門果復次此四果位對治五趣
得非擇滅餘位不尔謂預流果對治地獄傍
生鬼趣得非擇滅一來果對治人趣一分得
非擇滅不還果對治人趣全分得非擇滅阿
羅漢果對治天趣得非擇滅故佛唯說四沙

門果復次此四果位對治四生得非擇滅餘位不介謂預流果對治卵生濕生得非擇滅一來果對治胎生一分得非擇滅不還果對治胎生全分得非擇滅阿羅漢果對治化生得非擇滅故佛唯說四沙門果復次此四果位對治二邊餘位不介言二邊者謂欲界及

有頂對治欲界邊故得一來不還果對治有頂邊故得預流阿羅漢果故佛唯說四沙門果復次此四果位對治二有根本餘位不介二有根本者謂欲界及有頂對治欲界有根本故得一來不還果對治有頂有根本故得預流阿羅漢果故佛唯說四沙門果復次此

四果位能永對治二種惡思及彼異熟所依
諸蘊餘位不尔二種惡思者謂斷善根思及
起無間業思預流果能永對治斷善根思一
來果能永對治起無間業思不還果能永對
治彼異熟果阿羅漢果能永對治彼所依諸
蘊故佛唯說四沙門果復次此四果位對治
三法餘位不尔謂預流果對治三結一來果
對治三不善根及欲漏一分不還果對治三
不善根及欲漏全分阿羅漢果對治有漏無
明漏故佛唯說四沙門果復次此四果位對
治四法餘位不尔謂預流果對治見瀑流軌
見取戒禁取及後二身繫一來果對治欲瀑

流軛取及初二身繫一分不還果對治欲瀑
流軛取及前二身繫全分阿羅漢果對治有
無明瀑流軛及我語取故佛唯說四沙門果
復次此四果位對治五法餘位不尔謂預流
果對治疑蓋後三順下分結及五見一來果
對治前四蓋瞋嫉慳結及前二順下分結一
分不還果對治前四蓋瞋嫉慳結及前二順
下分結全分阿羅漢果對治貪慢結及五順
上分結故佛唯說四沙門果復次此四果位
對治六愛身餘位不尔謂預流果對治見所
斷意觸所生愛身一來果對治鼻舌觸所生
愛身一分不還果對治鼻舌觸所生愛身全

分阿羅漢果對治眼耳身觸所生愛身及修
所斷意觸所生愛身故佛惟說四沙門果復
次此四果位對治七隨眠餘位不尔謂預流
果對治見疑隨眠一來果對治欲貪瞋恚隨
眠一分不還果對治欲貪瞋恚隨眠全分阿羅
漢果對治有貪慢無明隨眠故佛唯說四沙
門果復次此四果位對治九結餘位不尔謂
預流果對治見取疑結一來果對治恚嫉慳
結一分不還果對治恚嫉慳結全分阿羅漢
果對治愛慢無明結故佛唯說四沙門果復
次此四果位對治九十八隨眠餘位不尔謂
預流果對治三界見所斷隨眠一來果對治

欲界修所斷隨眠一分不還果對治欲界修
所斷隨眠全分阿羅漢果對治色無色界修
所斷隨眠故佛唯說四沙門果復次此四果
位各出一種重煩惱際餘位不尔謂預流果
出見所斷重煩惱際一來果出能等起五無
間業重煩惱際謂欲界前六品煩惱能等起
五無間業後三品不尔勢力劣故不還果出
諸不善重煩惱際阿羅漢果出諸無記重煩
惱際故佛唯說四沙門果

問何故離欲界染立二沙門果謂一來不還
果離色無色界染立一沙門果謂阿羅漢果
耶脇尊者曰唯佛世尊能具正知諸法性相

勢用分齊餘不能知若離此染堪立二果便
即立二若離此染堪立一果便即立一故不
應難復次四沙門果無不皆因離三界染而
得建立謂離三界見所斷染立預流果若離
三界見所斷染及離欲界修所斷前六品染
立一來果若離三界見所斷染及離欲界修
所斷染立不還果若離三界見修所斷染立
阿羅漢果復次以欲界是不定界非修地非
離染地故離彼染立二沙門果色無色界是
定界是修地是離染地故離彼染唯立一沙
門果復次以欲界難斷難破難可越度故離
彼染立二沙門果色無色界易斷易破易可

越度故離彼染唯立一沙門果復次以欲界
過患增減過患堅固過患衆多故離彼染立
二沙門果色無色界與此相違故離彼染唯
立一沙門果復次以欲界煩惱猶如瀑流難
可越度故離彼染立二沙門果如人渡河其
水深廣濤波漂急數數止息乃能度之如契
經說邑主當知言瀑流者喻五妙欲色無色
界與此相違故離彼染唯立一沙門果復次
以欲界是險難界煩惱增重作業增重猶如
重擔難可越度故離彼染立二沙門果色無
色界非險難界煩惱作業設有增重而易越
度故離彼染唯立一沙門果如人擔重登嶮

難山數數止息乃能越度若至平地雖復擔
重而易遠涉此亦如是復次以欲界是雜穢
界猶如淤泥雜諸糞穢難可出離故離彼染
立二沙門果色無色界與此相違故離彼染
唯立一沙門果如糞聚上造立宮室雖復妙
好人不樂住色無色界亦復如是爲居欲界
雜穢法上雖復妙好賢聖不樂是故尊者僧
伽筏蘇作如是說此欲界中多諸過失謂喪
父母兄弟姊妹妻子眷屬亡失財位或被割
截耳鼻手足及諸身分或復遭於四百四病
由如是等種種因緣受諸劇苦如是欲界多
諸過失若離彼染摠立一切四沙門果猶少

況二復次以欲界有男身女身難可越度故
離彼染立二沙門果色無色界唯有男身易
可越度故離彼染唯立一沙門果復次以欲界
有男根女根難可越度故離彼染立二沙門
果色無色界無男女根易可越度故離彼染
唯立一沙門果復次以欲界有不善無記二
種煩惱難可越度故離彼染立二沙門果色
無色界唯有一種無記煩惱易可越度故離
彼染唯立一沙門果如不善無記二種煩惱
如是有異熟無異熟生二果生一果無慙無
愧相應不相應煩惱應知亦尔復次以欲界
有苦根憂根無慙無愧嫉慳段食及姪欲愛

五蓋五欲諸惡趣等種種過患難可出離故
離彼染立二沙門果色無色界與此相違故
離彼染唯立一沙門果復次欲界具有十八
界十二處等多有漏法難可出離故離彼染
立二沙門果色無色界有漏法少故離彼染
唯立一沙門果問何故離見所斷染立初一
沙門果離修所斷染立後三沙門果耶答見
所斷染易可遠離故離彼時立初一沙門果
修所斷染難可遠離故離彼時立後三沙門
果

說一切有部發智大毗婆沙論卷第六十五

義

軛 軛

二音 厄同

簿

正作 薄

迅速

上私 閏反

傲慢

上吾 告反

分齊

二字並 去聲

濤波

上音 桃

淤泥

上於 去反



